

manda il breve dil Papa che revocha quello fece a li do è in prexon di Padoa, dieno esser justitiati, et vol si observi la *Paulina*, e sopra questo lauda molto il reverendissimo Cornelio, qual in ogni cossa per la Signoria nostra si opera etc. Doman il Papa vol far zostre, per monsignor di la Moreta orator francese. *Item*, per letere particular, si sa di la morte di lo episcopo di Orvieto. Val ducati 800 de intrada, il Papa l'ha dato al cardenal Redolli.

81 • Fo leto una parte fata notar a Bortolamio Comin, ben ditata per sier Francesco Bragadin savio dil Consejo, a compiacentia di molti zentilhomeni e altri quali sono stati in Colegio per far dar la lectura a pre' Batista Egnatio veneto, il qual non vol esser balotato con altri, ma volendo dargela la ge sia data. E cussi notono di darli la lectura in humanità in locho di Raphael Regio è morto, qual è di salario ducati 150 a l'anno, leze a la Canzelaria e altri. E cusi si meterà il primo Pregadi. *Tamen* è mala stampa; tutti doveriano esser balotati, et Marin Bizichemi leze rethoricha a Padoa, voria esser balotato, dovea tenir conclusion qual le ha poste per tutto, *tamen* l'ha remesse. E cussi si sta su pratiche.

Da poi disnar, fo Consejo di X con la Zonta, ma prima *simplice*. Expediteno sier Luca Polani di sier Bernardin, retenuto in la preson di l'Armamento, per esser stato con Salvador Contarini e li altri in acto sodomitio contro una meretrice; et fo asolto. Et li altri condanati, *videlicet* sier Salvador Contarini qu. sier Piero ditto Pio, absente, che 'l sia in perpetuo bandizà di questa cità, terre et lochi, *videlicet* da mezzo el Quarner in là, con la taja solita di le leze, e rompendo, e preso el sarà, siali tajà la testa in mezo le do Colone, poi el capo fato in cenere. *Item*, Zuan Alvise Contarini natural di sier Nicolò, stia mexi 6 in la prexon Forte, e poi bandito di Venetia e dil destreto per anni 5, e contrafacendo stagi, hessendo preso, mexi 6 in la prexon Forte, e poi bandito di Venetia e dil destreto per anni 9, e poi rimandà al bando etc., con taja L. 300 di pizoli.

Item, Francesco Contarini fiol di Alvixe pesador di carne, che 'l compia mesi 6 in preson serado, poi bandito per tre anni di Venetia e dil destreto, e s' il contrafarà al bando, et sia preso, compia sei mesi in preson serado, poi sia remandà al bando, qual alhora habbi principiar et *hoc totiens quotiens*. Et cussi la matina sequente fono publicate. *Item*, trovano ducati 300 per dar a domino Jacomo Stapher capitano di svizari, a conto di la sua provision promessali. *Item*, balotono li Camerlengi chi dia far la ultima rata de l'imprestado, che è per du-

cati zercha 14 milia, et rimase sier Marco Contarini qu. sier Zacaria el cavalier, a la cassa di sora. *Item*, le corone di L. 5 pizoli 14 si spendeva gran numero in la terra, le calono, e spendesi L. 5 e pizoli 8 l'una.

A dì 23. La matina se intese esser zonte in His- 82 tria 4 nave vien di Soria, *videlicet* do di Cypro et do di Alexandria, state però tutte in Cipro, et portano *letere di Cipri, di*, come sier Andrea Sanudo qu. sier Benedetto, era merchante de li, era morto a di 6 Zugno. *Item*, se intese di Alexandria sier Benedeto Bernardo, che fo ditto era morto andando al Cayro, star bene, e cussi non morite.

Noto. A di 21 di questo fo scritto, per Colegio, una letera a Chairbech soldan al Cayro, per nome dil Signor turco, come per relation dil capitano di le galie di Alexandria havemo inteso la bona compagnia fa a nostri, e che magrabini desidera venir de qui per andar in Barbaria con le galie, li avvisemo questo anno per causa di molti legni armati stati in quelle aque di Barbaria non havemo mandà le galie; ma speremo questo altro anno i non sarà, e le si potrà mandar. Et fo scritto *etiam* in consonantia a sier Sebastian Zorzi consolo nostro in Alexandria di questo, aziò li magrabini, sono li, intendi il tutto.

Di Franza, fo letere di sier Zuan Badoer dottor et cavalier, orator nostro, di 11. Avisava come li a Poesi a di 10, fo il di de San Lorenzo, venendo a di 11, a hore do di note, la serenissima Regina havia partorito una puta. Il Re era venuto, è zonto a tal parto, perchè come le comenzò le doje, fo mandato per Soa Maestà, el qual vene a tempo; sichè esso Orator sarà compare, sicome li è stà scritto per il Senato dovesse esser. Aduncha il Re ha uno fiol che è il Dolfin et una puta.

Di Hongaria, di sier Lorenzo Orio el dottor orator nostro, di 7 Avosto. Come il re di Polonia barba dil re di Hongaria avia auto uno fiol di la fia di la duchessa di Bari, per il che il re di Hongaria ha fato grandissima festa, et lui s'è armato et corso la lanza, di anni 15, con tanto jubilo che *nihil supra*. *Item*, esso re di Polonia ha auto vitoria contra il Gran maestro di Prussia, e tolto il stato, e lui è ristreto in una terra. *Item*, altre particolarità, *ut in litteris*. Il sumario dirò poi.

Da poi disnar, fo Colegio di Savii, justa il solito.

Noto. Eri, per Colegio, fo scritto al Provedador di l'armada dagi do galie a madama Fiorenza Venier qual va a tuor il possesso di Pario in Arzipielago, le qual debbi levar sier Filippo Lion stato governador nostro de li, e la conduchi in Candia over a